


महाराजा रणबीर सिंह

सुचारू	पैमाइश	राहीबाही
न्याय—संहिता	हुक्मनामा	प्रचार—प्रसार
बज़ारतां	परगने	मकतब

महाराजा रणबीर सिंह हुंदा जन्म 1830 ई, च रामगढ़, साम्बा च होआ। एह महाराजा गुलाब सिंह हुंदे सपुत्तर हे। 1856 च इ'नें गी रियास्ता दी राजगद्दी पर ब्हालेआ गेआ। महाराजा बनने दे बाद इ'नें परजा दी भलाई—बेह्तरी दे बड़े कम्म कीते। इ'नें रियास्ता दा शासन सुचारू ढंगा कन्नै चलाने लेई जम्मू ते कश्मीर प्रांतें च बक्ख—बक्ख वजारतां बनाइयां ते रियास्ता गी प्रांतें, तसीलें ते परगने च बंडेआ।



महाराजा रणबीर सिंह ने रियास्ता च जिमीं सुधारें बक्खी खास ध्यान दित्ता, इ'नें जमीन दी पैमाइश करोआई ते गल्ला—बटाई दे थाहरा पर मालिया निर्धारत कीता। राहीबाही दे खेत्तरा च सिंचाई दियां बेहतर सुविधा देने आस्तै परानी नैहरै दी मरम्मत करोआई। इसदे इलावा जम्मू प्रांतै च रावी ते उज्झ दरेआएं च लौहकियां—लौहकियां नैहरा कढ़ोआइयां। इ'नें अखनूर कश चन्हा दरेआ चा इक बड्डी नैहरा दा

कम्म शुरू करोआया। इस नैहरा दा कम्म इंदे सुर्गवास दे बाद पूरा होआ ते इसदा नांइ “रणबीर नैहर” रक्खेआ गेआ।

महाराजा रणबीर सिंह होरें अपने शासन काल च परजा दे हिता च केई विशेष कम्म कीते। इनें जनता गी न्यांइ देआने लेई अदालतां कायम कीतियां ते पैहली बारी न्याय-संहिता बनोआई जेहड़ी ‘रणबीर पीनल कोड’ नांइ कन्नै प्रसिद्ध ऐ।

महाराजा होरें रियास्ता च बपार गी बढ़ावा दित्ता ते शालें गी बेचने लेई लंदन च इक केंद्र बनोआया ते शालें पर लग्गे दा टैक्स माफ कीता। रेशम दे उद्योग गी बढ़ावा देने लेई जपान जमां तूतें दियां बधियां किस्मां मंगोआईयां। थाहर-थाहर तूतें दे बूहटे लोआए ते लोकें गी रेशम दे कीड़े पालने ते तंद कड़ढने लेई बधिया तरीकें दी सखलाई दोआई। रेशम-उद्योग दे कन्नै खंड तयार करने दे कम्मा गी बी बल दित्ता ते आर,एस,पुरा च खंडू दा कारखाना कायम कीता।

महाराजा होरें रियास्त जम्मू-कश्मीर च शिक्षा दे प्रचार-प्रसार च बड़ा योगदान दित्ता। इनें स्कूल, पाठशाला ते मकतब खलोहाइयै लोकें गी पढ़ाई-लिखाई दियां बेहतर सुविधां प्रदा कीतियां। इसदे इलावा कताबां छापने लेई छापाखाना बी स्थापत कीता। डोगरी लिपि ते डोगरी भाशा च पढ़ाई-लिखाई च खास रूचि लेई। इंदे राज च सन 1884 ई. च इक सरकारी हुक्मनामा जारी होआ, जिसदो तैहत हर मलाजम गी डोगरी लिपि च दरखास्त देने की हिदायत दिती दी ही ते जेहड़ा मलाजम डोगरी लिपि च लिखना नेई जानदा, उसदी तन्खाह चा दस फीसदी कटौती करने दी सजा निश्चत कीती गेदी ही।

महाराजा रणबीर सिंह होरे अपने राजकाज दरान लोकें गी दूरसंचार

दियां सुविधा देने आस्तै डाकखाने बी कायम कीते । इ'नें जनता लेई स्वास्थ सरबंधी बेहतर स्कूलतें दी व्यवस्था बी कीती ते हस्पतालें च रोगियें गी मुफ्त दवाईयां देने दे प्रबंध बी कीते । इसदे इलावा जतीम ते बेस्हारा बच्चे ते विधवा जनानियें लेई माली मदाद देने दा सरिस्ता बी कीता । इस चाल्ली महाराजा होरें अपने राजकाल च जनता दे हितें दी रक्खेआ कीती, ते विकास दी दिशा च नमें कम्म कीते ।

सन 1885 ई, च महाराजा हुंदा सुर्गवास होई गेआ ।

अभ्यास

1. हेठ दित्ते गेदे सुआलें दे जवाब लिखो :-

- क). महाराजा रणबीर सिंह हु'दा जन्म कदूं ते कुत्थै होआ हा ?
- ख) गद्दी उप्पर बौहंदे गै महाराजा रणबीर सिंह होरें परजा दी भलाई—बेहतरी आस्ते केहड़े—केहड़े कम्म कीते ?
- ग) महाराजा रणबीर सिंह होरें बपार गी बढ़ावा देने गितै केहड़े—केहड़े कम्म कीते ?
- घ) महाराजा रणबीर सिंह होरें जिस न्यास—संहिता गी बनोआया, ओह किस नांऽ कन्नै प्रसिद्ध ऐ ?
- ङ) महाराजा रणबीर सिंह हुंदे राजकाल गी डोगरी दा सनैहरा दौर की ऽ, आखेआ जंदा ऐ ?

2. श्रुतलेख : हेठ दित्ते गेदे शब्दें दे अर्थ देइयै बाक्य बनाओ :-

सुचारू	पैराइश	न्याय—संहिता	हुक्मनामा
बजारत	परगना	मकतब	रणबीर

सपुत्तर निर्धारत लौहकियां स्हूलतां

3. स्हेई शब्दे कन्नै खाल्ली थाहर पूरो :-

दस फीसदी, रणबीर नैहर, सुर्गवास, सपुत्तर, ध्यान

क) महाराजा रणबीर सिंह होर महाराजा गुलाब सिंह हुं'दे.....
हे ।

ख) महाराजा रणबीर सिंह होरें रियास्ता च जिमीं सुधारें बक्खी खास ..
..... दित्ता ।

ग) चन्हां दरेआ च कड्ढी गेदी नैहरा दा नांS..... रक्खेआ
गेआ ।

घ) हुक्मनामे तैहत सरकारी मलाजमें गी डोगरी लिपि च दरखास्त
नेई लिखने उप्पर अपनी तन्खाही चा..... दी कटौती
करोआनी पौंदी ही ।

4. पढ़ो समझो ते लिखो :-

बजारत = बजारतां तसील = तसीलां
.....

नैहर = नैहरां अदालत = अदालतां
.....

5. स्हेई कथन दे अगगै (✓) ते गलत दे अगगें (x) दा नशान लाओ :-

क) महाराजा गुलाब सिंह हुंदा जन्म सन 1830 च होआ हा । ()

ख) महाराजा गुलाब सिंह होर महाराजा रणबीर सिंह हुंदे दादा
जी हे । ()

- ग) उज्झ ते रावी दरेआएं चा नैहरां कढोआइयां गेइयां। ()
- घ) 'रणबीर पीनल कोड' न्याय— संहिता दा नांऽ ऐ। ()
- ङ) डोगरी लिपि दी बरतून बारै सरकारी हुक्मनामा सन् 1864ई, च जारी होआ हा। ()

अध्यापकें आस्तै निर्देश

इस पाठ च बजारतां, नैहरां, सुविधां, किस्मां, दुआइयां, कताबां, खासे स्त्रीलिंग शब्द बहुवचन च प्रयुक्त होए दे न। उ ' आं ते सभने स्त्रीलिंग दे बहुवचनी रूपें च खीरा च 'आं' प्रत्यय लगदा ऐ पर अकरांत, आकारांत आदि बक्ख—बक्ख स्वरें आहलियें स्वरान्त स्त्रीलिंग संज्ञाएं दे खीरा च बहुवचनी 'आं' जुड़ने करियै दे मूल रूपें च किश परिवर्तन बी उठी औंदे न। जि'यां :—

कुड़ी + आं = कुडियां

नूह + आं = नुहां

पाठशाला + आं = पाठशालां

अध्यापकें गी चाहिदा दे जे ओह विद्यार्थियें गी इ'नें उदाहरणें राहें स्त्रीलिंग दे बहुवचन बनाने पूरी जानकारी देन।